

MEP ta di acuerdo cu CAft

Awo cu tin surplus gobierno mester presta placa na AWSS na interes abou pa un planta nobo di purificacion di awa

E problematica di Bubaliplas no ta uno desconoci pa comunidad. E ta un problema cu pa añanan largo tabata causa molester, y a percura pa hopi caso contra pais Aruba den corte, ademas di tabata afectando nos turismo.

Aruba ta profila su mes internacionalmente como un destinacion di calidad. Y pa keda mantene e bon nomber, Bubaliplas a bira un emergencia nacional y tabata mester di solucion urgente.

Intentonan pa Gobierno aloca fondo, a wordo frustra pa CAft den 2022, y hasta a menasa Aruba cu un KB si sigui cu e inversion ey. Pa e motibo aki Gabinete Wever-Croes, cu aprobacion di Parlamento di Aruba, a privatisa RWZI un aña pasa y traspasa e plantanan pa AWSS, un compania estatal mescos cu AAA, SETAR, APA, WEB y ELMAR. Durante tratamiento di e privatisacion den Parlamento, ta hopi informacion a wordo comparti y documentonan a wordo suministra. Por cierto, tur e informacion aki ta disponible serca tur e parlamentarionan y ministernan cu e tempo ey tabata den Parlamento y gobierno.

E structura aki ta segun cosehonan e unico forma cu ta duna e compania estatal e libertad y autoridad pa busca financiamiento riba mercado local pa cumpli cu su inversionnan cu como compania ta considera di suma importancia y necesario pa su funcionamiento.

GABINETE WEVER-CROES A WORDO ASISTI PA U GRUPO DI PROFESIONALNAN RIBA E MATERIA

A lanta un stuurgroep, consistiendo di representantenan di e tres

ministerionan encarga cu e proyecto aki:

Ministerio di Naturalesa, cu a apunta como lider di e stuurgroep señor Jossy Figaroa.

Ministerio di Infraestructura, cu a apunta DOW y DWJZ pa e asuntonan huridico.

Ministerio di Energia, cu a apunta Utilities Aruba NV.

E stuurgroep a haci uzo di expertonan internacional manera RoyalHaskKoning riba e materia, y asina a presenta nan conseho con ta miho pa soluciona e problema di RWZI.

AWSS TA BUSCANDO FINANCIAMIENTO RIBA MERCADO LOCAL

Inversion total, conforme informacion suministra durante e tratamiento di privatisacion den Parlamento, y conseho di DOW y RoyalHaskKoning ta di 250 milyon florin den un periodo di 5 aña. E inversion cu por cierto ta pa mehoracion y modernizacion di e infraestructura di e sistema di drenahe (riolering) pa Aruba completo, y lo resulta den un expansion di e capacidad di e plantanan aki.

AWSS ta actualmente den proceso di busca e financiamiento riba mercado local, pasobra sin e financiamiento, e plan di modernizacion y expansion no lo por wordo concretisa y ni tampoco ehecuta. Te na e momento aki NO tin financiamiento comprometi. Sinembargo, awor cu tin surplus, Fraccion di MEP ta di acuerdo cu CAft, cu Gobierno di Aruba por presta e placa na AWSS, na interes hopi mas abou.

